



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : Tir Yimyim

tiryimyim@aolima

tir yimyim

TAPAK 3



akistan nung court kati Imran Khan aputsü totuyuba agütsü

Kharge ya Congress Tir süaka kari Remote Control amer: PM Modi



VOL. XX NO. 138 (ADOK 138) DIMAPUR RASEMNÜ (WEDNESDAY)

METSÜREMI (MARCH) 01, 2023

₹ 5.00

## District ajak nung counting centers renemogo: CEO Nagaland



Kohima nung NLA General Election 2023 atema polling ktdangsurtem mapa temer Hombar nikongdang Kohima DC office-i arudang agiba noksa ka angur.

**Dimapur, February 28, 2023**

**(TYO):** District 16 nung 14 buba Nagaland legislative Assembly, General Election 2023 atema vote counting centers renemogo ta Chief Electoral Officer, Nagaland-i metetdaksü.

March 2, 2023 anepdang 8:00 ako nungi votes azüngtsü. Iba anogo atema General Observers dak alia Commission-i Counting Observers mapa lezmüksütsü aser parnoki counting center den votes azüngba maparen ajak reprangtsü ta CEO-i ashi.

Assembly Constituency sasep nung Supervisors, Assistants, Micro Observers aser Tabulators ajanga votes azüngtsü.

Peren aser Pughoboto indang counting center ji ADC Office, Zunheboto nung Town hall /

Badminton Hall, Wokha nung Tiyi Hall, Tuensang nung CKS /SIRD Hall aser tanüngba district 11 ji pei Deputy Commissioner Office nung asütsü, ta CEO Nagaland-isa metetdaksü.

Votes azüngba anogo Strong room lapoktsü aser Counting room nung Candidates, RO aser Observer lia aser Videography o CCTV coverage dena EVMs bener arutsü.

Election Commission of India-i Authority letter agüja alir media nisungtem counting centers (entry/ re-entry) atema aita daksütsü. Ketdangsurtem aser media nisung ajaki authority letter nung lateta aliba inyaksangshitsü ta Media cell, CEO Office Nagaland-i sangdong ka nung metetdaksü.

**Kohima, February 28, 2023**

**(TYO):** Nagaland kübok polling station pezü nung re-poll asütsü atema Election Commission of India-i tetuyuba agütsüogo.

District pezü kübok polling station pezü nung March 1, 2023 anepdang 7:00 ako nungi nikongdang 4:00 ako tashi re-poll asütsü.

"General Observers-i osang agütsüba aser kuli ajak reprangba sülen Representation of the People Act, 1951 nung lateta aliba ama polling station 4 nung February 27 nü votes enokba magir aser March 1 nü re-poll asütsü shimogo" ta ECI under secretary Surender Singh-i CEO Nagaland dangi shidi ka zülü.

Re-poll asüba constituency aser polling station temji 35-



Zunheboto A/C (Zunheboto district) kübok 9-New Colony S/W, 39-Sanis A/C (Wokha district) kübok 9-Pangti V, 41-Tizit seat (Mon district) kübok 7-Jaboka Village aser 57-Thonoknyu (Noklak district) kübok 3-Pathso East Wing lir.

Commission-isa State Election election ktdangsurtem dang re-poll asütsü aliba polling stations telongtet nung osang tejangja agütsütsü aser shidi ajanga

political party aser candidate tem ashitsü tetuyuba agütsüogo.

Re-poll asüba anogo nungsa item polling stations indang kulikaket ajak reprangtsüla ta ECI-isa tetuyuba agütsü.

Polling station pezü nung re-poll asüba atema State Election office nungi osang kecha mali.

Hombarnü CEO Nagaland V Shashank Shekhar aser IGP Limasunep Jamir nati polling osang metetdaksüdang 32-Atoizu A/C, 40-Bhandari A/C aser 55-Monyakshu A/C kübok tesem kar nung mepetmesü adokba indang dang ashi.

Iba mapang tenati re-poll asütsüba indang osang kecha mashi aser security personnel talila lezmüksüba ajanga tensa azüoktet ta metetdakja liasü.

## Kiphire nung tensa majungba ajanga 'internet services' shibanger

**Dimapur, February 28, 2023**

**(TYO):** Kiphire district nung 14 buba NLA atema polling asüdang mepetmesü kar adokba sülen Home Commissioner Abhijit Sinha-i Mongulbarnü internet services shibangtsü tetuyuba agütsüogo.

Kiphire district nung election sülen tensa mejungi akümtsü ana nung lir ta Home Commissioner-i sangdong ka nung ashi.

SMS aser WhatsApp aser ano tanga social media

sabangtem ajanga olulu aser tiyazü osang, noksa, video amala belenshitsü akok aser iba ajanga tensa raksatsü ta paisa ashi.

Anungji Indian Telegraph Act, 1885 nung Section 5 kübok tenokdangba agütsür. Tanga tetuyuba ka magütsü tashi Kiphire district ajungalen Service Providers ajak indang Mobile Internet/ Data Service shibangtsür, ta Home Commissioner-isa metetdaksü.

Iba tetuyuba sülen manidakra Section 188 CrPC aser Indian

Telegraph Act, 1885 kübok temerenshi alitsü, ta Abhijit Sinha-isa shisem.

Republican Party of India (RPI) pusemertemi 60-Pungro Kiphire Assembly Constituency nung re-poll asütsü takhangba agütsüba sülen tensa mejungi aküm ta osang angazüker.

Iba constituency nung candidate asem lir. Parnokji RPI(A) candidate Yangseo Sangtam, NDPP candidate Kiusumew Yimchunger aser INC T Atsuba nunger lir.

## Kohima Police-i 'Counting Day' atema Traffic tetuyuba agütsür

**Dimapur, February 28, 2023**

**(TYO):** 14 buba NLA atema votes azüngba anogo March 2, 2023 asoshi Kohima Police-i traffic tetuyuba kar agütsüogo.

Phoolbari "Y" Junction nungi DC office aser 1st Assam Rifles (AR) Junction lenmangtem No entry aser No parking zones asütsü ta PRO, Kohima Police-i

sangdong ka nung metetdaksü.

Item tesem nung gari kar danga anena ayuba ngura Sections 201 MV Act nung aliba ama atsür aotsü aser iba senji gari kiburtemi menoktsü. Counting anogo nung timtem kecha melü tembangtsü atema senso ajaki amalitep alitsü mepishir, ta Kohima Police-isa ashi

## Longleng jila nung Section 144 ozüng agütsür

**Dimapur, February 28, 2023**

**(TYO):** Longleng Deputy Commissioner aser District Magistrate-i asüng nikongdang 7:00 ako tashi Longleng jila nung Section 144 ozüng agütsüogo.

Police-i Longleng jila nung tensa mejungi akümba aser meimchir taküm den kiojen lendong ajurutsü ana nung aliba osang shiogo" ta Dharam Raj, IAS-i sangdong ka nung ashi.

Longleng jila nung Bharatiya

Janata Party (BJP) wako aika songa aliba ki ka kilem nungi nisungtemi lung aonba video ka social media nung kanga prokshir.

Iba ki ya Health & Family Welfare Minister aser 50 Longleng Assembly Constituency nung BJP candidate S Pangnyu Phom indang ta osang angazüker.

Ano, tanga video ka nung Nationalist Congress Party

(NCP) wako songa aliba ki ka nung nisungtem asaprangba angur.

Hombarnü polling asüdang BJP aser NCP pusemertem tsüngda mepetmesü adoka liasü ta osang angazüker.

50 Longleng A/C nung candidate pezü liasü. Parnokji BJP nungi S. Pangnyu Phom, NCP nungi A. Ponsi Phom, INC nungi Denngan Y. Avennoho aser Independent candidate Phuyam lir.

## Centre-i 'Heat Wave' atema tekümdangtsü sangoktsür

**New Delhi, February 28, 2023**

**(Agencies):** India kübok tesem kar nung kanga tatsük akümba ajanga Union Health Ministry-i Mongulbarnü teinyaktsü kar metetdaksüogo.

India Meteorological Department (IMD) ajanga 2023 atema mezüngbuba 'heat warning' sangdongba sülen Health Ministry-i 'Dos and Don'ts' metetdaksü.

Tatsük ajanga shirangba indang national action plan nung shilem ka ama Ministry-i tatsük mapang high-protein chiyungtsü machitsü aser anüngdang 12:00 ako nungi nikongdang 3:00 ako tashi anü maputsü atema metetdaksü.

Union Health Ministry-isa nüboritem dang metzüra nunga akok tashi tzü peria ajemtsü shiogo.

Nisungtemi Oral Rehydration Solution (ORS) yanglur ajemtsüla aser pei kidang tasentzü, buttermilk/lassi o fruit juices nung metzü tera enoker ajemtsüla. Akok tashi kilung nung aser temekong tesemtem nung kazütsüla ta Ministry-i metetdaksü.

Tatsük mapang watermelon, cucumber, lemon aser orange amala süngjanglijang achitsüla aser süoshi tanep, tepongba aser sentsü tesangwatem asemtsüla. Maneni anüshi, korang mesüra towel agi tekolak nembangtsüla, ta parnokisa shisem.

## Tripura, Nagaland, Meghalaya nung NDA-i sorkar akümtsü

**Guwahati, February 28, 2023**

**(Agencies):** Exit polls kar ajanga Tripura, Nagaland mesüra Meghalaya nung sorkar akümtsüsa menden mengutetsü ta ashir saka Assam Chief Minister Himanta Biswa Sarma-ibo Mongulbarnü northeast state asemprong nung NDA-i sorkar akümtsü ta metetdaksüogo.

"NDA (National Democratic Alliance) nung dena aliba telok kechaia Congress mesüra Trinamool Congress den

mesentakteptsü" ta Assam CM aser NEDA convenor-i ashi.

"State asem nung hung assembly malitsü saka NDA-i sorkar akümtsü" ta pai ashi.

Northeast state asem nung shirnok chief minister asütsü ta osangbeneri asüngdangdang "Tripura aser Nagaland nung akhi ama asütsü" ta Sarma-i langzü.

"Tripura nung BJP CM aser Nagaland nung onok teloktet sorkar lir. Ajisüaka Meghalaya

nungbo menden takok anguba sülen chief minister atema lemtetsü" ta CM Sarma-isa ashi.

Tripura nung February 16 aser Nagaland o Meghalaya nung February 27 anogotem assembly election agia liasü. March 2, 2023 nü results metetsü.

Tripura aser Meghalaya atema exit polls aikati 'hung assembly' asütsü saka menden teimba angurji NDA nung adenba teloktem asütsü ta bushitetba osang metetdakja lir.

## Rio-i Kohima nung kitsük-kirong lendong atalokba tesem semdang



Chief Minister Neiphiu Rio-i February 28, 2023 nü Mao Market kitsük-kirong lendong atalokdak tesem semdangba noksa nung angur.

**Dimapur, Tsüklai/February 28 (TYO):** Nagaland Chief Minister Neiphiu Rio-i February 28, 2023 nü Mao Market, Kohima nung kitsük-kirong lendong atalokdak tesem semdang osangtsüsang agia Fire & Emergency Services aser District Administration

ajanga mera agibatem metetbelatepa liasü.

Pai iba lendong agi kongshir aliba kibongtem semdang, kong dokan aser nisung alidak mi lendong tulu adoka liasü.

Tensa asadanga sülen Chief Minister-i iba mi lendong ajurua alirtem nmem Chief

Minister Relief Fund nungi nungi sen lakh 20 teyari agüja liasü.

Chief Minister meina Deputy Commissioner, Kohima, Shanavas C IAS; SP Kohima, Imnalensa; Kohima Village T Khel putu menden aser sorkar ketdangsürtem arua liasü.

## DC & DEO Kohima ajanga vote azüngtsü atema sangdonger

**Dimapur, Tsüklai/February 28 (TYO):** Deputy Commissioner aser District Election Officer, Kohima, Shanavas C IAS ajanga sangdong ka nung Kohima District atema vote ya March 2, 2023 nü DC Office Complex, Kohima nung tsünglanglen shia aliba tesemtem nung azüngtsü metetdaksü.

1. 8 Western Angami A/C indang DB's Court nung tables 6 yur azüngtsü.
2. 9 Kohima Town A/C indang DPDB Hall nung tables 8 yur azüngtsü.
3. 10 Northern Angami-I A/C indang DRDA

Conference Hall 7 nung table 5 yur azüngtsü.

4. 11 Northern Angami-II A/C indang Pensioner's Building 1st Floor nung table 6 yur azüngtsü.
5. 14 Southern Angami-I A/C indang DC's Conference Hall nung table 5 yur azüngtsü
6. 15 Southern Angami-II A/C indang DC's Conference Hall nung table 5 yur azüngtsü.

Iba atema Kohima District nungi candidate ajak dang ozüing agi melaba ama counting agents tem Form 18 nung shimtsüla, counting table shia ka-ka, Returning Officers temelaba

nung Returning Officer Table atema ka shimtsüla.

Counting centre temeket meter 100 asazüka "pedestrian zone" yutsütsü aser gari kata memelatsü, ta ashi.

Candidate/pa indang election agent aser counting ahents pai shimba aser Election Commission/District Election Officer/ Returning Officers ajanga agütsüba photo identity card alirtem security ring mezüingbuba ajanga aittsü melatsü.

Counting hall telung nung temelaba makai cellular phone, camera amala amshitsü memelatsü, ta sangdong ajangasa ashi.

## Assam Rifles temi Asür Surendra Lal Arya bilemtet

**Dimapur, Tsüklai/February 28 (TYO):** HQ IGAR (North) kübok Assam Rifles indang Kohima Battalion ajanga February 28, 2023 nü Asür Rifleman Surendra Lal Arya bilemteta Kohima nung naro yutsüba sentong ka agia liasü.

Rifleman Surendra Lal Arya ya 1995 küm November 22 nü Assam nung Chachar district kübok Kalain Chara tesem nung telungpur den raradang kanga sashia yiru aser February 28, 1996 nü iba zübu ajanga asü.

Asür Surendra Lal Arya

kinungtsü Kamala Devi-a iba sentong nung virtual yimya nung Haldwani, Uttrakhand nungi repranga liasü.

Iba sülen Unite Commandant-i Kamala Devi den sensaksem aka aser Battalion tenüing nung akhum agüja liasü.

## National Science Day 2023 mungogo



**Dimapur, Tsüklai/February 28 (TYO):** Pilgrim Higher Secondary School nung azünger kaketshir temi February 28, 2023 nü National Science Day munga liasü.

1928 küm India nunger Physicist Sir C.V Raman-i Raman Effect ngutetba

tenüing nung iba anogomung ya amunger.

Iba anogomung nung street play, Alima aser ita kumtetba indang video sayua liasü.

Iba sülen Science laboratory tools sayuba ka school indang science laboratory nung school

principal Kaini Khekho Kikon-i lapoktsü.

Taküm National Science Day ya "Global Science for Global Wellbeing" omen nung ajemdaker ayongzük aser iba omen nung ajemdaker kaketshirtem den yimya balala agi ayongzüka liasü.

## Kohima Press Club lokti senden ayonger

**Dimapur, Tsüklai/February 28 (TYO):** Kohima Press Club indang Constitution nung Article VII Clause C (4) nung mela aliba ama March 1, 2023 nü LCS Conference Hall, Kohima nung anepdang 11:00 ako nungi tenzüka Kohima Press Club pur Special General Meeting ka

amentsü, ta Kohima Press Club tongti zülur Atono Tsükrü Kense-i sangdong ka nung metetdaksü.

Iba senden nung Kohima Press Club züngsem ajak temolung agüja adentsü mepishir, ta sangdong ajangasa ashi.

## Assam Rifles temi kitsük-kirong lendong ajurur alir nem teyari agütsü



**Dimapur, Tsüklai/February 28 (TYO):** IGAR (North) kübok Assam Rifles, Dimapur Battalion ajanga February 28, 2023 nü Master Colony, Dimapur nung alirtem nem jangotzü lema agüja liasü.

February 25 aonung Master Colony, Dimapur nung kitsük-

kirong lendong tulu adoka ki 30 jungnüa rongdok aser kibong 70 talidak makai kumdaksü.

Parnok timtemba ajiteta Assam Rifles temi jang, wheat aser shini amala lema agüja liasü. Iba ama mapa tajung inyakba asoshi nüburtemi pelaba lemsatepa liasü.

## Manipur CM-i electric vehicle sayaogo



**Imphal, Tsüklai/February 28 (Agencies):** 2070 tashinung net-zero carbon emissions tongtettsü linüki nükjidong yua aliba den sendakba nung Planning Department atema Manipur Chief Minister N Biren Singh-i Hombarnü TATA electric vehicle saya liasü.

Manipur nung tang mezüingbuba electric vehicle yagi carbon emissions ajemba nung yaritsü aser mopung menenba nungi nokdangba kisüing masü saka libajen müreka ayutsü, ta CM Biren Singh-i ashi.

"2070 tashinung net-zero carbon emissions atongtsü linük nükjidong aliba den sendaka iba amala electric vehicles talila benoktsü asadanger," ta pai metetdaksü.

Electric gari tem ya TATA Nexon EV aser Tata Tigor EV alitsü aser electric gari temi carbom emissions ajemba nung yaritsü, ta Singh-i ashi.

Electric gari tem timba akumba mechi state nung

charging station amenoktsü nüngdak, ta pai ashi.

Manipur nung 2026 tashinung electric gari shilem 20 jungdaksütsü nükjidong nung 'Manipur Electric Mobility Policy, 2022' ya yanglu, ta ashi.

Gari tem nungi carbon adokba ajanga tzü-mopung melenba nung shilem lir aser iba tebilemstü koktettsü asoshi alima ajunga nung electronic vehicle ya teti asoshi solution lir, ta Manipur chief minister-isa ashi.

Pai diesel auto tasen registration agiba anentsü pai ayongzük, kechiaser iba gari yagi mopung menentsüba den külemi ola menentsür aser yimti nung tereprangtsü mazür, ta ashi.

Sorkari nungi teyari kar agüja rickshaw agi melentettsü.

Iba sentong nung PDA chairman L Rameshore Meitei, Additional Chief Secretary, V Vumlunmang aser Tata Motor nungi teshimtet nisungtem dena liasü.



February 28, 2023 nü New Delhi nung India aser Denmark tsüngda 'Partners for Green and Sustainable Progress' senden amenba sülen Denmark Crown Prince Frederik Andre Henrik Christian aser Crown Princess Mary Elizabeth na den Minister of Foreign Affairs of Denmark Lars Lokke Rasmussen, Union Minister Prahlad Singh Patel aser ketdangsertem tangokba noksa nung angur.

### LAC tensa sülen tang mezüng China foreign minister-i India semdangtsü

**New Delhi, Tsüklai/February 28 (Agencies):** 2020 küm June ita nung Line of Actual Control (LAC) nung tensa raksaba sülenbo tang mezüng China foreign minister, Qin Gang-i India semdanga G20 Foreign Ministers' senden nung adentsü.

Osangbenertem den jembidang Chinese foreign ministry nungi ketdangser, Mao Ning-i, "G20 senden nungji tongtibangsüa alima rongsenketzüng tsütsü tayongzükkba onük balala nung rangloker jembitsüla. G20 foreign ministers' senden junga katettsü atema China-i tanga linüktem den külemi inyaktüsü melunga lir," ta metetdaksü.

Tang LAC nung tensa majungba dak sendakba nung

India sorkari China sorkar amokmerenba sülen March ita nung China foreign minister-i India semdangtsü.

India semdangba mapang nung India Union external minister, S Jaishankar-i China foreign minister den jurila senden amentsü imlar. Iba senden nungji India-i China foreign minister dang, LAC nung tensa mejungra linük ana tsüngda tesendaktep tajungba makümsü, ta ashitsü.

2019 küm taoba mapang foreign minister, Wang Yi-i New Delhi semdangba sülen 2020 küm May ita nung anüdoklen Ladakh nung linük ana tsüngda sepaitem rara adoka liasü.

Arrotsülen tensa süngjemtsü atema India aser China na

tsüngda military commanders level nung senden 17 ben tashi menogo.

Delhi nung India Tir kübok G20 Foreign Ministers sendenji March 1-2 anogotem nung amentsü.


G20 senden nungji Ato kilonser, Narendra Modi-i G20 züngsem linüktem nungi foreign minister tem den jembitsü.

Tawa Bengaluru nung G20 nungi Finance Minister tem senden mena liasü.

G20 züngsem linüktemji Argentina, Australia, Brazil, Canada, China, France, Germany, India, Indonesia, Italy, Japan, South Korea, Mexico, Russia, Saudi Arabia, South Africa, Turkey, United Kingdom aser USA lir.

### Kharge ya Congress Tir süaka kari Remote Control amer: PM Modi

**New Delhi, February 28 (Agencies):** Gandhi kibong aitsüba olen ka nung Ato kilonser, Narendra Modi-i, Mallikarjun Kharge ya Congress Party Tir, ajisüaka "remote control" amerji shibaar alimai meteta dang lir, ta metetdaksü.



Ato kilonser Modi-i, Chhattisgarh nung 85buba Congress plenary senden nung anü agi puaka pa (Kharge) nem anüshi-a magütsü, ta ashi.

Karnataka kübok Belagavi nung terenlok projects aika semzüksüba sülen lokti den jembidang Modi-i, "Ni Mallikarjun Kharge

akhümstübur; tesüiba küm 50 shi tsüngda parliamentary mesüra legislature nung pai aika ajangshia lir. Nüburtem tenzüksü atema pai akokba tashi meranga inyakogo. Party Tir, Kharge kanga tain süaka Chhattisgarh nung Congress senden alidang pa junga mezüngshi," ta metetdaksü.

"Anü kanga pua kanga tatsük liasü, ajisaüka Congress Tir nem anüshi agi aküm magütsü. Pa anasa nokdaka alir ka atema dang anüshi liasü. Ibaji ajanga Congress Tir Kharge ya tenüng atema dang ta jangjar. Pa mezüngshibaji ajanga

remote control ji shiba ket nung aliar ajaki meteter," ta Modi-isa metetdaksü.

Belagavi nung roadshow agiba sülen lokti den jembidang Modi-isa, Congress-i Karnataka aser state nung lenirtem akhüm metsübur, ta ashi.

"Modi taküm ali tashibo parnoki kecha mesütettsü ta meteta Congress nung alirtem kanga jashir. Ibayongji parnok ajaki 'Modi süadokang, Modi süadokang' ta yimyim ayimer aser karibo leper atur. Ajisüaka linükibo 'Modi, nü meyong lotus naro apungtsü ta ashir," ta pai metetdaksü.

Karnataka nung assembly elections agitsü mapang ana nung lia paisa gol ana aketba sorkari (State aser Centre naprongla nung BJP sorkari) inyaktetba mapa balala metetdaksüba den külemi, Centre aser Karnataka naprongla nung BJP sorkari kanga kera terenlok mapa inyaktüsü, ta nangzük.

### Manish Sisodia aser Satyendar nati minister menden nungi anen

**New Delhi, February 28 (Agencies):** Delhi excise policy ochimashi ken o dak sendakba nung Aam Aadmi Party (AAP) lenir, Manish Sisodia-i Delhi Deputy Chief Minister menden toktsüogo.

Sisodia den külemi Delhi Health Minister, Satyendar Jain-ia pa menden toktsüogo. Jain-a tanga ochimashi ken o ka nung temeja jail ka nung puoka lir.

Tenapronglai minister menden nungi anenba shidi agütsü aser Chief Minister, Arvind Kejriwal-i shidi anapronglaji agizükogo.

Ano maneni shidiji Delhi LG,

VK Saxena nem agütsütsü. Delhi excise policy ochimashi ken o nung anogo ana tejaklen Central Bureau of Investigation (CBI)-i Delhi Deputy Chief Minister Sisodia pua liasü.

Delhi sorkari benokba excise policy kübok yi ayoktsü atema license atema sübokrem agi, ta AAP nem tai tonglokja ken o benoka lir aser iba ken o dak sendakba nung CBI-i Sisodia dang asüngdangyadar.

Mongolarnü Delhi Deputy Chief Minister Manish Sisodia-i Supreme Court nem bail temepishiba agütsü saka court-

i pa dang iba ken oji Delhi High Court nem ang agüjang, ta tuyu. Chief Justice of India, DY Chandrachud-i aniba bench-i, tang ama tensa ka nung SC-i iba ken o agizüksüsa masü, anungji Delhi High Court nem ang agüjang, ta tuyu.

Hombarnü Delhi nung aliba Rouse Avenue Court-i anogo pongunü atema Deputy Chief Minister Sisodia CBI ket nung agütsüogo.

Ano külen Central Bureau of Investigation (CBI)-i Delhi Health Minister Satyendar Jain danga Tihar jail nung asüngdangyaogo.



February 28, 2023 nü Jammu nung PoJK Refugee Front nungi züngsemtemi longkak aitdang tangokba noksa nung angur.

**FORM NO. 14**  
[See Regulation 33(2)]

**OFFICE OF THE RECOVERY OFFICER- III**  
**DEBTS RECOVERY TRIBUNAL, GUWAHATI**  
Suwarna Bhawan, House No. 12, New Town Path,  
Near Hanuman Mandir, G.S. Road, Ulubari, Guwahati- 781007 (Assam)

**DEMAND NOTICE**  
Notice Under Sections 25 to 28 of the Recovery of Debts & Bankruptcy Act, 1993 and Rule 2 of Second Schedule to the Income Tax Act, 1961.

**RC / 122 / 2022**  
**BANK OF BARODA (ERSTWHILE VIJAYA BANK)**  
-Versus-  
**TEMSUMEREN JAMIR**

To,  
**(CD 1) TEMSUMEREN JAMIR**  
S/o Satem Jamir, House No. 73, Block No. 9, Mouza No. 02, Patta No. 820, Landmark Colony, PWD Dimapur, P.O. and P.S. East Dimapur- 797112.  
**(CD 2) MRS. WATISENLA**  
House No. 73, Block No. 9, Wife of Mr. Temsumeren Jamir, Mouza No. 02, Patta No. 820, Landmark Colony, Dimapur, NAGALAND- 797112.  
**(CD 3) MISS ARENZUNGLA JAMIR**  
Daughter of Mr. Temsumeren Jamir, Mouza No. 02, Patta No. 820, Landmark Colony, Dimapur, NAGALAND- 797112.  
**(CD 4) MISS KATHYINLA**  
Daughter of Temsumeren Jamir, Mouza No. 02, Patta No. 820, Landmark Colony, Dimapur, NAGALAND- 797112.

This is to notify that as per the Recovery Certificate issued in pursuance of orders passed by the Presiding Officer, DEBTS RECOVERY TRIBUNAL, GUWAHATI in **OA/89/2019** an amount of **Rs. 92,51,239.00 (Rupees Ninety Two Lakhs Fifty One Thousands Two Hundred Thirty Nine Only)** along with pendentlite and future interest @11.95% Compound Interest Monthly w.e.f. **01-02-2019** till realization and costs of **Rs. 95,000 (Rupees Ninety Five Thousands Only)** has become due against you (Jointly and Severally / Fully / Limited).

(1) Amount due as per the Recovery Certificate:	Rs. 92,51,239.00
(2) Interest from 01.02.2019 to 28.11.2022 @ Rs.11.95%	Rs. 53,42,242.83
(3) Costs	Rs. 95,000.00
<b>TOTAL</b>	<b>Rs. 1,46,88,481.83</b>

2. You are hereby directed to pay the above sum within 15 days of the publication of the notice, failing which the recovery shall be made in accordance with the Recovery of Debts Due to Banks and Financial Institutions Act, 1993 and Rules there under.

3. You are hereby ordered to declare on an affidavit the particulars of yours assets on or before the next date of hearing.

4. You are hereby ordered to appear before the undersigned on **31-05-2023** at 10:30 a.m. for further proceedings.

5. In addition to the sum aforesaid, you will also be liable to pay:  
(a) Such interests as is payable for the period commencing immediately after this notice of the certificate / execution proceedings.  
(b) All costs, charges and expenses incurred in respect of the service of this notice and warrants and other processes and all other proceedings taken for recovering the amount due.

**Given under my hand and the seal of the Tribunal, on this date: 23-01-2023**  
**RECOVERY OFFICER**  
**DEBTS RECOVERY TRIBUNAL GUWAHATI**



## TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 01, 2022

### Kasa government, kasa tebilemstü

**V**ote-bo ano mazüng saka taoba government den kasa NDPP o BJP nati government akümtsübaji temetet dang kümogo, anungji Chief minister-a Neiphiu Rio-sa asütsü aser pai aniba telongjem teloktem nungi adokba tatartem nem paisa mapa lezmüksütsü asünungji, pabo joko iba mapaji kakat nung asühdanga inyak tenzüker asütsü. Aji oda, Nagaland tatar senden nung menden 60 nungi NDPP teloki menden 23 aser BJP teloki menden 11 ngutetra, ibajia mapa alemdangbo tebilemstü asütsü, kechiyong linük temzüng agi Nagaland ama tatar menden 60 alidak kilonser (ministers) 12 (20 %) dak tali shimtsü memelar. Anungji, Speaker aser Deputy Speaker shimerbo tanüngba tatar 20 jibo kilonser menden agibo matatsü, anungji government kümli nungi temulung mechitep aser melemtep tenzüksü. Iba amaji temulung mechitep oa alidang, ano 2014 küm tetenzüklen Lok sabha election agidang, aoksaka, BJP teloki center nung government mekümtet nungbo, ashiko, Nagaland nunga BJP toktsünütsüa akok, anungji government nung temelenshi ataloktsübajia Nagaland nungbo kecha ashitsü makok. Ajisuaka, nübortem asoshi tajung kaji tangbo taoba government nung amato masü opposition takang aser tesashi alitsü, anungji tatar senden nunga nübortem asoshi ken o tongtibang tepboka jembitsü aser government-i tim mesüi inyakba nunga tai pua anidaker alitsü. Aji oda, jeminü mejeminü ta masü saka tatartem mulungjang nung Naga nunger tang aser tarutsü yimten aser loktiliba tia indang shisabulua bilema lira, mezüng tatar senden nung Naga yimten nüchiso dak aketba tebilemstü aser Eastern Nagaland purtemi tang aliba Nagaland state nungi razüka onüa akangba onüktem indang benoka jembitsü imlar. Onük anaprongla ya tongtibang rongdak nungdak ken o lir, anungji joko talangka moi onük anaprongla ya taküm kümsa tatem küma latettsü merangtsüla. Atangji, kodang onük ana ya tatem küma letetdir Nagaland yimten inyakyim ajak nung temelenshi adoktsü. Talisa, Naga yimten tebilemstü ya tatem küma latetra, yimsü tesüdak government anener Interim government ka mapang tatsüka atema shimtsüsa akümtsü. Iba jagi election magidang, tamasa, Naga yimten tebilemstü ya latetmatsüla ta yimten aser lokti lenirtemi election jakdang jembia aruogo. Ano, Naga yimten tebilemstü ya tatem mekümtetyonga, Eastern Nagaland purtemi akangba amaji ataloktsüra, iba jagia tang aliba Nagaland yimten inyakyim daksa kongshitsü alinungji, Eastern purtemi election magidangsa telemtetba agitsü merangdangogo, ajisuaka India government-i election sülen parnoki bilemba ataloktsütsü ta nangzük nungji, yangji temulung lemer parnoka akhi ama Nagaland election nung shilem agiogo. Atangji, Eastern Nagaland lenirtem o India government na tsüngda kechi komaka tenangzüktepba yur election nung shilem agiar memetet, saka Nagaland election nung shilem agidaktsüba tetezüji Frontier Nagaland-bo magütsütsü sudi ta angateter. Ajisuaka, parnoki aginüba ajunga mesüaka, parnok nem parnoksa senotsü amshia parnok alidak terenlok mapa inyaksüsa yimten tashi ka agütsüra, ibajia state tasen ka angu amai asütsü. Atangji, tang Nagaland anüdoklen terenlok mapa meinyakteti nübortem timtemba ya tangar tai masü asenok tai ta Nagaland anüdoklen nungi adoker yimsüsür aser lenirtemi shitettsüla. Iba amaji ka peisasa pei tashimait rajema marutetra, yimten jenjang tajungba ka nung aliyonga kecha balala merenloktettsü. Asenok ajaki pei yim, pei constituency aser pei district ajungtsü indangbo kanga jembir saka oagiji melinür. Ajisuaka, Dimapur aser Kohima nung dang linüba shisatsü agibo pei nübortem timtem aser nungdak reprangteta meinyaktettsü. Aji oda, yimsüsürtem dang masü saka school tesayurtemi dena pei yimtsüng aser pei district nung oagi mesayunüra, medical doctor kati pei district nung melinüra aser nübortem tenzüksü mapa nung ita sen chia inyakertem ajaki Dimapur aser Kohima nung dang linüra, kodaser yimtak alir asen nübortem yaritettsü? Aji oda, yimten kümsük küm melenshir dang ashi, asenok asoshibo election agia government tasen akümyonga, kasa government aser kasa tebilemstü agi kangshi tenzüksü, anungji asenok tangatetba melenshir Nagaland tajungba ka asoshi asenok nisung shiai timtem terabo agia tajung kabosa inyaksüla.

## OLEMSABANG

### NISUNG AM TESA AGI TAKÜM MALIR

~ L. Kika Pongener.

"Nisungi am tesa agi dangbo taküm malitsü, saka Tsüngrem bang nungi adokba o shia agi alitsü" (Mathi-4:4). Yisu Khrista alima nung tebui tenyaba mapa inyaksü ano metenzükdang tzü nung baptir lia, temenen tanelai atitangtsü asoshi pa azüngmeyakdak lisem limai anir ao, aser anogo lirnu aser lir aonung tashi lumiseta lir külen, temenen tanelai Yisu dangi arur ashi, 'Na Tsüngrem chir sura, item lung agi amtsük kümang ta shiang' ta atitang. Saka Yisui langzü, 'Nisungi am tesa agi dangbo taküm malitsü, saka Tsüngrem bang nungi adokba o shia agi alitsü'. Iba putu mapang ya tanü amai sen kanga bulua amshiba mapang ka masü, anungji parnok taküm alitsü atema amtsükji kanga tongtipang liasü. Yongji temenen tanelai lung jagi amtsü kümadakjang ta ashi sudi. Tanü putu nung asübo ashiko, 'Item lung yagi Sen kümdakjang ta shila'...Aser Yisu-ia 'Nisung sen agi dangbo taküm malir'... ta langzüla...ta asenoki shisadanger. Atangji Yisu-i inyakdi sura lung agi amtsük kümdaktsütsü atema pa tsüngdang aji kecha tasak masü, ajisuaka mojing sentong nung pai ashiba anga-a aji inyaksübaji Yisui khenyongi memulung. Atangji Yisu-i ashiba ama alima nung nisung ya amtsük aser chiyungtsü agi dang taküm ya alir masü, chiyungtsü tepok sunga chiyunga jemer, temang tenuktelen ajunga nung tashitak kecha meli-i anema tashi-ita aliba ya, Tsüngremi taküm agutsüyong asenok ya taküm alirba dang. Ajisuaka, Tsüngremi asenok dak nungi taküm tangola ya agienatokra iba minute-second nungji asenok takümji tatempang asütsü.

Alima ya tazüngla dang aliba Tsüngremi o ka agi dang anung aser alima ya poktetdaksü. Ammang aser tesangwa lemdang aser alima aser tzüyim sedang aser ayazüba shiruru ajunga adokdaksü. Atangji Tsüngrem bang nungi adokba o-ji tashi tulu lir. Asenok ya Tsüngrem bang nungi adokba o ka agi taküm alirba dang, Tsüngremi asenok taküm tangola agienatokra, iba minute-second nungji asenok arakzüba ya anenadoktsü. Asenoki kanga tuluka amai bilemyongjia asenok takümji naro ka tanep tobur junga punga aliba nikongdangbo azüla-a aoba ama, aser aküm (Shadow) ka amai jena oadoktsü. "Tetsüri asoba nisung arishi tatsü, naro ka ama apunger aser azüla-a oadoker; Ano aküm ka ama ajener aser meli-i akümer" (Yob-14:1). Asen arishi anogo ya sutaker suksen ka dang nungi tekaraba aor aser teimla mekai akümer. "Kü anogo sutaker suksen dang nungi tekaraba aor aser teimla mekai akümer" (Yob-7:6). Temenen tanelai Yisu atitangba ama anogo shia iba kasa ola jagi asen Naga nunger-a aika atitanga alitsü sudi. Temalen shisemba ama, Yisu alima nung aliba mapangji nisung taküm alitsü asoshi amtsükji kanga tongtipang liasü sudi. Temenen tanelai Yisu atidangba amaji tang putu nung ya atidang ka asünung, "Item lung yagi 'Sen' kümdakjang ta shila"...Aser Yisu-ia "Nisung sen agi dangbo taküm malir"... ta langzü-la.

Tanü putu nung sen dang lirbo aseni kechi aginur angur aser kechi inyaknur inyakteter, oda nisung tepsettsü tashia akoktsü. Ajisuaka aseni inyakba mapaji kenu asen dangi meyipa shilangtsü ta tsüba bilema shingaia mapa tamajung meinyaksüla. Atangji, sen dang lirbo kechi inyaknur ajak inyaktettsü, sen dang agutsürbo nübör ajak aseni tenya-ashi angar akümtsü, lanur nubujong ajungaji aseni sen agi alizüker, aseni kong koda anishinur yamaji anishitsü akoktsü. Kechiyong sen aser supokrem agi nisung tenuk pokdaksür aser nisung dang meimtsü aser aochia bilemba shisatsü samadaksür. Nisung aikati sen dang ngurbo meinyaksüyim mapa ajak inyaksü temulung ulua akümer aser nisung dang aaktsüba shisatsü meli-i akümer. Anungji shirnok nem Tsüngremi rongsen moatsü, parnok ajaki Tsüngremi ne nem moatsüba rongsen jagi yimjung, terenlok, mapa tajung inyaksüba lenmang nung amshir asü (?) Mesura alima raksatsü, yimten, arogo aser lokti nung mepetmesu/telemsa adokdaksütsüba lenmang nung amshir...??? Tsüngrem o-i ashir, "Kechiaser nisungi alima ajak ajangzüker pei taküm samara, pai kechi ajangzüksü, mesura nisungi pei taküm melen kechi agutsütsü" (Mathi-16:26).

Asenok alima nung arishi talangka aliyongjia tenem ser metsü, mesura lir anasü dang alitsü. Anungji iba arishi anogo tatsüka alidangji, mapang tajung alangzüka mapa tajung inyaksüla. Asenoki Bank aika nung sen aika rizünga yur, ki tulu atongtepa yanglua yur, kimong lumong aika alidena yur, chiyungtsü chir mechima nangdaka yur...Ajisuaka, item rongsenji magitetsüsa, chiyungtsüji mechitetsüsa, anu kodang adoker kodang alur memeteti, yipten nungi mesakteti, asen sasa asen temang memeyipteti, ayako-a dena alitsüsa tashitak tamajung kar agi menepa...!!! Iba ama aliba takümji alima nung tali meshizük asütsü. Aser ano tia makar karbo anjung tenari dang anu aiba ama anojungi arishi leptokra koda tesusatsüka asütsü !!! Yisui o entepba ka ashiba...Takar nisung kati alu nung tsük jenti aro, aser pai pei temulung nung ashi, Ni kechi inyaksü (?) Kechiaser ni kü tsük kongta tayudak maka. Ni kü Jentem benzüker tuluba yangludi aser idakji ni kü tsük ajak rizüngtsü. Aser ni kü Tanela dang ashitsü, "Tanela küm aika asoshi rongsen aika rizünga lir, kazüa liang, Chiang, jemang aser pelaa liang". Saka Tsüngremi pa dang ashi, Na tamashisang !!! Taonungsa ne taküm ne dak nungi akangtsü, aser kechi rongsen nai rizüng aji shir meyong asütsü...??? (Luke-12:16-20) nung züngra iba otsü angutsü. Aji oda, iba takarsang tsük paikaji bendena liaka Tsüngremi "Taonungsa ne taküm ne dak nungi akangtsü" ta...'O' ka dang ashi nung aji tatempang liasü. Atangji mimchir ya 'chiyungtsü aser sen' akaba agi taküm ya alir masü, saka Tsüngrem taochi aser Pa o agi dang taküm ya alir. Anungji mapa ajak nung 'Sen'... 'Sen' dak dang rangloker inyakba shisatsü ya endokdi. Nisung am tesa agi taküm melitettsü...Iba küsaji sen kija agia asenok taküm ya melitettsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

### Sri Lanka nung election atsülangba anema Arogoi longkak ait



February 26, 2023 nü Sri Lanka yimtiba, Colombo nung sorkar anema longkak aيتدang Police-i longkak aيتدtem apuba noksa nung angur.

**February 27, 2023:** Sri Lanka nung Anglican aser Catholic Arogotemi sorkar dang democracy tangatetba nung nokdaksü ayongzükba den külemi sorkari election atsülangba anema longkak aitogo.

February 26, 2023 nü linük yimtiba, Colombo nung longkak aيتدtem senshidaksütsü atema police-i tear gas aser tzü khalokja liasü.

Election atsülangba anema Colombo nung dang masü saka linük tesem aika nung longkak ait.

Sri Lanka nung Anglican nungi tongti putir anati sangdong ka ajanga, 'tang linük ya kijai tashi tali amshia yimsüsüba kübok lir' ta metetdaksü.

"Democracy linüktem nung lenirtem shimtsü atema sensotem nem maongka agütsür. Sensotem nem iba maongka magütsübaji ajanga asenok kijai yimsüsüba kübok lir ta sayur," ta February 25 nü Colombo nung tongti putir, Dushantha Lakshman Rodrigo aser Kurunegala nung tongti

putir, Keerthisiri Fernando nati külem sangdong ka ajanga metetdaksü.

Election ayongzüka agitsü atema sorkar ket nung sen mali, ta shia sorkari election atsülangba sülen nüburtemi sorkar anema longkak aيتد.

Nütsüng million 22 aliba linük nung rongsenketzüng tsütsü timtem tulu adokba ajanga linük nung totzü, chiyungtsü, mozü aser cooking gas agi anünger. Yaküm nüburtemi longkak aيتba ajanga taoba mapang Tir, Gotabaya Rajapaksa-i linük toktsür ajen aser Tir menden nungi anen.

Tang linük nung khenpiga atema sorkar tenteta lir.

Sorkari sensüh sen billion 51 aotsü atema kidanger linüktem aser International Monetary Fund densema international agencies aika ajurua teyari meshir.

Sri Lanka nung election ji March 9 nü agitsü liasü saka atsülangogo.

Arogo nung tongti putirtemi, sorkar asalentong majungba, ochimashi aser junga ketdang mesütetba ajanga Sri Lanka-i

tang iba tensa ajurur, ta aitsü.

"Mapang shidak nung asalentong tajung benoka inyak asübo tang nüburtem yamai tim-metemla. Linük nung shisakartem aser mapa meranga inyakertem aika lir, ajisüaka yimtenren nungi teshimtet telok ishika aser sorkar ketdangsertem ishikati nendaka meinyakba ajanga tang iba ama timtem tensa ajurur," ta Arogo lenirtemi metetdaksü.

"Yimtenren asr rongsenketzüng tsütsü tayongzükba balala koktettsü atema linük nung telongjem aser democracy nüngdaker," ta lenir anatisa metetdaksü.

1796 küm Sri Lanka nung Anglican Arogo tenzüka liasü, iba sülen 1845 küm Colombo nung Arogo tentet aser 1950 küm Kurunegala nung Arogo tentet.

Colombo nung Cardinal, Malcolm Ranjith-ia, Tir aser sorkari linük temzüng kübok election agitsü atema tim achaayanga inyaksüla; election atsülangba ya democracy anema lir, ta ashi.

### Pope Francis-i April ita nung Hungary linük semdangtsü

**February 28, 2023:** April ita nung Pope Francis-i Hungary semdangtsü aser Ato kilonser, Viktor Orban ajurua onük aika nung o lemteptsü, ta Vatican sangdong ajanga metetdaksü.

Lenir anati Ukraine nung rara aser jenoka aliba bendangertem atema-a jembitsüa akok.

Mapang shia Pope Francis-i refugee tem temeden atema jembir, ajioda Budapest yimti nung Orban den senden amenba mapang nunga refugees tebilemstü onük jembitsüa akok.

April 28 nungi April 30 tashi Pope-i Hungary semdangba mapang nung pai sensakertem, lanurtem aser refugees ajurutsü.

Pope-i mapang talangka nungi Hungary semdangtsü tebilemba liasü, ta Hungary ambassador to Holy See, Eduard Habsburg-i metetdaksü.

Ato kilonser, Orban atema otongdar, Zoltan Kovacs-i twitter ajanga, Francis ya yimjung osangbener ka asütsü; Central aser Eastern Europe nung ibaji nüngdaker, ta metetdaksü.

Arrshi küm 86, Pope Francis-i küm ana tsüngda tang agi tanabenbuba Hungary linük semdangtsü. Iba linük nung Catholic Khristan nütsüng teimba lir.

2021 küm September ita nunga Pope Francis-i Hungary semdanga liasü. Ghonda tenet tsüngda pa leniba nung tekülem sentong ka agi aser Orban den senden mena liasü.

Iba sülen yaküm April ita nung Pope-i Vatican nung Orban agizüka liasü.

Iba mapang nungji Pope-i Hungary linük nung Orban-i Ukraine nung rara ajanga jena

arur refugee tem linük nung nung agizükba atema pelaba lemsatepa liasü.

Tang tashi nung Hungary nung Ukraine nung 34,248 nem refugee jenjang agütsüogo.

Russia-i Ukraine amakba atema Orban-i Russia aitsüogo, ajisüaka Russia Tir, Vladimir Putin tenüng tetshiabo maittsür.

Pope Francis-i Ukraine nung rara anentsü atema pai akok tashi ajak inyaksü, ta nangzika liasü aser yamaji inyaker saka tang tashi nungbo kecha mesüteter.

2013 küm Francis Pope shimba sülen pai bendang linük 40 semdangogo aser Hungary ya 41buba asütsü. Pai tanurtema ajurutsü sentong lir.

Hungary nung nütsüng teimbaka Khristantem lir aser linük nütsüng shilem 37 bo Catholic Khristantem lir.

### ANOGO ABEN TSÜNGREM DEN

#### Rongsen Lemsaba

Yangi Dawidi Tsüngremi akokbatem rasaa ashir. "Na temaleni atu, nai tepuoker bener ao: Au, Kibuba Tsüngrem parnok den alitsüsa, tashi mangartem nungia agizük"(t.8). Ibai Kibuba atuba noksa lir. Tasen Lai nung ibai Efesa 4:8 nung angur.

Yisui asenok asoshi kechi inyak reprangang. Mezüngbuba, Pa asenok dang tama ao. "O Tsüngrem, na kodang ne nübur tsüngdangi ao, Na kodang azüngmeyakdak ajanga ao" (t.7). Na tanü kong lidir liang, nai dang Tsüngremi mulungba nung lira, Pa ne dang tama aotsü. Idaki Israel nung aram ajanga aoba noksa sayur. Israel nungeri parnok sasa telok kümteta aotsü Tsüngremi meimla. Aonung pai parnok mi tongshi agi ani aser anügdang mepet tongshi agi ani. Ozüng süngdenji Tsüngrem parnok den dena aliba temaitsü liasü- parnok tejakdang ao. Pai asenok jakdang aor aser asenok menen kangki nung aben.

Tanabuba, Pa asenok temaleni atu. "Na temaleni atu" (t.18). Kibuba Yisu sentsüwangshi daki atu, aser Tebu tajichilen sentsüwangshi nung mena lir. Pa shiba takok angutsü asoshi asenok jakdang ao tang takokji lemsateptsü asoshi asenok temalen mena lir.

Tang Pa asenok rongnung alir. "Kibuba Tsüngrem parnok den alitsüsa" (t.18). Aser Pai kechi inyaker ? Pai pa purtem nem sempet agütsür. Ibai takokeri tenangzükba oset lemsaba noksa lir. Asenok koda takar! Iba asoshi asenoki Pa koda asangtsüla. Tanü nai Takoker dak temulung alemer asü?

Khrista asüba aser shia aruba ajanga, na takar küma lir. Kangki telok Tsüngremi ne den angati lemsateper. Iba taküm nung nai tamakok angutsü menügdak.

### Meghalaya nung gari lendong ka nung Khristan putir ka aser nun 3 asü



**February 28, 2023:** February 26, 2023 nü Meghalaya state nung gari lendong ka nung Khristan putir ka aser nun asem den tangar nisung ana asü.

Ri Bhoi district kübok Sumer nung cement bena aliba truck anisangi gariji mazüokteti gari tila ka dak tsükoktsüba lendong nung gari anisang, tesayur ka, putir ka aser nun asem asü.

Truck ji kanga keraa Guwahati-i aluba mapang gari tilaka dakji tsükoktsü.

Iba lendong nung asürtemji Arogo nung putir aser Barama nung aliba St. John's High School nunga principal, Mathew Das, sisters- Melamine Dantes, Promila Tirkey aser Rossie Nongrum aser tesayur Mairan den gari anisang nung liasü.

Asür ajakji Assam kübok Bongaigaon Arogo nungi liasü.

Bongaigaon nung tongti putir, Thomas Pulloppillil-i, "Tribal nun sister Rossie bo taoba ita nung ang tenangzükba agia liasü. La ozü Arogo nung sister tem ajurutsü atema arua

liasü. La meinoktsüi aoba mapang nung iba lendong atalok," ta metetdaksü.

"Iba osang angashia Arogo nung züngsemtem aoksar," ta Pulloppillil-i metetdaksü.

Nun temji Congregation of the Sisters of Our Lady of Fatima nungi liasü aser parnok indang provincial house ji Meghalaya nung lir, anungji parnok tasü mangji yangji aremstü, ta pai ashi.

Assam Christian Forum-ia iba lendong nung asürtem atema mangyimba lemsatep.

Assam Christian Forum nung otongdar, Allen Brooks-i sorkar dang iba tatalokba jungjunga bushisüngdangtsü aser takoksa angur kibongtem nem senotsü teyari agütsütsü mepishiogo.

Bongaigaon Arogo ya Guwahati nung aliba Arogo nungi jakzüka liasü.

Bongaigaon nung nütsüng million 5.2 lir aser Khristan nütsüng 56,855 lir. Khristantemji teimbaka tribals aser Bodo nung lir.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Paklapaklar**

(adj) tejak nung sentsü mait (pale)

\* Tanübo candidate-ba tejak **paklapaklar** angu.

**Pakma**

(v) oset ka agi ana kümdaktsü ( split into two)

\* Asenoki longmi **pakmar** sünglang atemer.

**OLONG PAITEP # 6443**

1		2		3		4	5			
				6						7
		8								
9				10		11				
			12						13	
						14				
16										17

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S \_ \_ \_ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

**OLONG PAITEP # 6442 TELANGZÜBA**

**TIPIEN :**

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

**LANGTSÜNGLEN :**

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among,
- 12. Miim, 13. Anem.



**2023 FEBRUARY ITA LILI RESULT !**

February ita nung Lili tajungtiba (First) shimteta tanü yangi lepshia agütsür. Lili zülur-i March 10, 2023 tashi nung Tir Yimyim Office nungi senpet agizüktsü mepishia metetdaktsür.

**ALOKBA O SOBANGBA NA SHISA BULUR :**

**Alokba** : Temba, ni Kanga shisabulura no.

**Sobangba** : Waa, tang ama election mapang nung anogo nung asemben akshi akshi den chiyunga, temanglemtsü pei jemshi jema, carrom kaa kazürang anogoshi hajera sen noklang pungu-ngu süoker ki bushiba facility yur kechi shisa bulur, hü?

**Alokba** : Aji ashirba ato-- "ito koato" ta ahabato. 27 February sülenjibo asenok kazüdak camp yaa malitsü, longkor toa lokadoktsü, carrom masayatsü, joko azümasen tenteter hajera-a mounütsü, pasa mechiyungnütsü--- iba jagi shisa bulurba atiiiii.

Lilir : WhatsApp

**Guinness World Record nung Bihu tsüngsang yidaktsütsü merangtsü**



**Guwahati, February 28, 2023**

(Agencies): April 14, 2023 nü Guwahati kübok Sarusajai stadium nung nisung teimtibai Bihu tsüngsangba world record yanglutsü merangtsü ta Assam Chief Minister Himanta Biswa Sarma-i metetdaktsü.

Iba sentong nung dancers aser dholis 11,500 ajanga shilem agitsü aser Guinness Book of World Records nung züluoktsü merangtsü ta pai ashi.

Patgaon, Kokrajhar nung Bodo Sahitya Sabha indang 62 buba Annual Conference nung

jembidang CM Sarma-i iba ya ashi.

"Bihu nüngtugu kümdaktsütsü aser alima sabang nung sayutsü atema iba sentong atonger. February 27 nungi Kalakshetra nung iba atema training tenzüokgo aser choreographers-i tsüngsangertem yaritsü" ta pai metetdaktsü.

Iba sentong nung Prime Minister Narendra Modi adentsü aser national o international sabang nung prokshitsü.

Iba sentong nung Chief

Minister aser Governor tem den G20 aser Southeast Asian Ambassadors jaoktsü.

Iba anogo Ranghar, Guwahati AIIMS, Palasbari aser Sualkuchi bridge tem lapoktsü.

Nisung 11,500 rongnung 70% tetsür aser 30& tebur asütsü aser tsüngsangertemji arishi küm 15 nungi 35 tsüngda asütsü.

Shilem agirtem ajak nem transportation aser costume allowances agütsütsü aser sorkari nisung shia nem transportation atema Rs. 300 aser costumes atema Rs. 3000 agütsütsü.

Bihu ajungkettsü atema Assam sorkari March 1 nungi April 14, 2023 tashi power loom gamosas, mekhela sadors aser power loom aronais mayoktsü tenokdangba agütsüo.

**Amit Shah-i Mar 17 nü Assam Rifles complex tasen lapoktsütsü**

**Aizawl, February 28, 2023**

(Agencies): Union Home Minister Amit Shah-i March 17 nü Aizawl anasa Assam Rifles indang complex tasen lapoktsütsü, ta Chief Minister Zoramthanga-i ashi.

Aizawl anasa aliba Zokhawsang nung Amit Ahah-i AR complex lapoktsütsü, ta pai osangbener dang ashi.

Aizawl tiyongtsü nungi kilometer 15 shi pilar

Zokhawsang tashi Assam Rifles tesepe belener. November 2018 nung assembly election agidang Mizo National Front (MNF)-i inyaktsü nangzükba rongnung AR tesepe belentsüba ya onük ka liasü.

February 2019 nung Union Home Ministry-i Assam Rifles dang May 31, 2019 tashi nung Zokhawsang-i battalion headquarters belentsü tetuyuba agüja liasü.

India nung paramilitary force tejentiba Assam Rifles indang tesepe ana Aizawl yimti tiyongtsü Zodin aser Khatla tesemtem nung lir.

Zodin nung aliba tesepe Zokhawsang-i belentsü. Yaküm November ita Amit Shah den senden amendang Zoramthanga-i Assam Rifles tesepe belentsü menuba ajanga Aizawl nung infrastructural projects mapa inyakba nung tetsükdak ajurur ta shia liasü.

**Tirap nung Assam Rifles aser police-i NSCN (IM) züngsem ka apu**

**Itanagar, February 28, 2023**

(Agencies): Assam Rifles indang Khonsa Battalion den Tirap Police ajanga NSCN (IM) züngsem ka apu.

Arunachal Pradesh kübok Tirap district nung February 27 nü telungpur apu.

Tirap district kübok Noglo

yimtsüng nung telungpur ka lir ta osang angazükba sülen Assam Rifles sepaitem den Tirap Police-i mita ao. Idangji parnoki telungpur den prangpong apu.

NSCN(IM) züngem ya Noglo nunger Nali Homnyu Nyamtey ta jangaogo.

Pa ya Myanmar nungi miima aru aser Indo-Myanmar arrtsü anasa aliba yimtsüngtem nung tashiyim agi sen sarutsü atema aruba liasü. Pai Noglo aser Laju circle nung alirtem aser yimtsüng lennirtem amokmeren ta AR sangdong ka nung ashi.

**GOVERNMENT OF NAGALAND  
DIRECTORATE OF TREASURIES & ACCOUNTS  
NAGALAND::KOHIMA**

NO.DTA/ESTT-149/2022/

Dated Kohima, the February, 2023

**NOTIFICATION**

This is a reminder to all the HODs and DDOs to submit the GPF details for Grade-IV & Work-Charged Employees as notified vide Circular No. DTA/ESTT-149/2022 dated 15.12.2022 on or before the 3rd of March 2023. The aforementioned Circular and also information sought, listed departmentally, may also be downloaded from <http://treasuries.nagaland.gov.in> under the Grade IV GPF Menu

Sd/- (R.N.YANTHAN)

Principal Director.



**Tenüng** : AKUMLONG LONGKUMER  
Yim : Longjang  
Tasoba anogo : 01/03/2016  
Küm : 7  
School : G. Rio  
Talidak : Kohima



Jabaso Akumlong arishi küm tenet tashi moaja aruba asoshi Tsüngrem tenüng asanger, ano maneni anema aliba aser taküm tajung nung yujang ta onoki sarasademtsur.  
~ Temeim Otsü, Obuo aser Baby Aren.

**TENÜNG** : MR. ARENTEMJEN KICHU  
Tasoba anogo : 1st March 2019  
Küm : 4  
Class : A  
School : Govt. Middle School, Alisungkum



Talidak : Tsusapang, Mokokchung  
Tsüngremi Arenba arishi talang moajangma.  
~ Chuchu Kumara, Alongba, Majemla, loving families.

## Nigeria election: Atiku aser Obi dang Tinubu jenjang tajungba

**Abuja, Tsüklai/February 28 (Agencies):** Nigeria tir election agiba indang osang state 36 aliba nungi 14 indang sangdongba nung ruling party candidate Bola Tinubu jenjang tajungba nung lir.

Tang tashinung zünga aliba vote shilem 44 dak tema Tinubu-i nguteta lir. Pa den tokteper Atiku Abubakar-i shilem 33 jungnüa nguteta lir.

Labour Party nungi Peter Obi-i shilem 18 jungnüa nguteta lir, shibai yimti tulutiba Lagos nung Tinubu madak takok ngua liasü.

Hombarnü election osang sangdongba tesem nungi Abubakar aser Obi teloktem ayazüka ao.

Electronic voter system tasenba nung tashishitsü lir ta Peoples Democratic Party (PDP) aser Labour Party ajanga ashir.

Vote azüngtsü asoshi electronic device amshiba national election ibai mezüngbuba alitsü.

Opposition party temi ashishitepba ya Independent National Electoral Commission (Inec)-i magizüker.

Inec chairman Mahmood Yakubu-i result osang maneni sangdongtsü ta ashi.

Inec ajanga sentong junga meyagluba aser osangtsüasang shidak magitepba aser mesangdongba ajanga yimya nung tamang makar, ta European Union observer temi ashir.

Nigeria yimtiba, Abuja nung aliba election centre nung PDP ketdangsur temi iba election inyakyim ya ashikülak mapa dena lir ta ashi aser tang yimsü tesüdak All Progressives Congress (APC) ya Inec den lungjemer inyaker, ta aitsü. Labour Party-i election sangdong anena atatsü mesüra election agishitsü akhanger.

Iba election result agi temolung masürtemi court dangi aotsüla ta APC-i ashi.

Mitkari yimsü asüba 1999

küm tembangba sülen Nigeria nung APC aser PDP nati amokbanger lia aru.

Taoba mapang kangabo mejangjai aliba Labour Party nungi Obi ya tang mezüngbuba tokteper aser pai two-party system ya melenshitsuüsü nangzüka lir.

Pa ya lanurtemi busemer aser Nigeria nung vote agütsüsü temsüa alir shilem asem lanurtem lir. Par asem den ano danga candidate 15 lir.

Tang tashinung Tinubu yagi state trok nungi vote timba ngua lir, Abubakar-i pongu aser Obi-i state asem nung vote timba ngua lir.

Nigeria nung state 36 den linük yimtiba Abuja lir aser first round nung takok angutsü atema item state tem rongnung 25 nungibo shilem 25 angutsü nungdaker aser linük ajunga nungia vote timba angutsüla.

Mezüng round nung nungdakba ama vote mongutetra tematiba jenjang ana nung alir tsüngta tokteptsü.

## Pakistan nung court kati Imran Khan aputsü totuyuba agütsü



**Islamabad, Tsüklai/February 28 (Agencies):** Danga linük tekolaktem aser bendanger tongtipang nisungtemi sempet agütsüba ozüngi memelai ayokba mechi Mongulbarnü Pakistan nung aliba court kati taoba ato kilonser Imran Khan bail makai aputsü totuyuba agütsü.

District and Sessions Court Judge Zaffar Iqbal-i Pakistan-Tehreek-e-Insaf (PTI) tekolakba aputsü totuyuba agütsü aser ken o ya March 7 tashi mejembi atatsü ashi.

Judge Iqbal-i ashiba agi agütsüsü liasü aser tai tonglokja alisang aiben jaokaka court matsüngdangi maru.

Sempet aliba atema Khan anema ken o balala benoka lir aser item rongnung ato kilonser ka ama Toshakhana state depository nungi jenjang tajemba agi sen aika jenjang Graff wristwatch agizüker tajangzük atema ayokba densema lir.

Cricket asaya aliba nungi yimten yimsüsür akumsang arishi küm 70 tain Imran Khan ya Election Commission of Pakistan (ECP) ajanga Constitution indang Article

63(1)(p) kübok sempet aliba atema tiazü kuli agütsüba aser sangdongba mechi ato kilonser inyaksü metemsü kumdaktsü. Item rongnung Graff anütetsü, cufflinks ana, jenjang aketba pen ka, kerika, Rolex watch pezü pa ato kilonser ama inyakdang tajemba jenjang nung alizüker pa ajangzüksü asoshi ayokba alitsü.

Toshakhana ken o mechi ECP ajanga pa party chairperson office nungi anendaktsüsü maparen inyakba anentsü asoshi Khan-i January ita Lahore High Court teyari bushia liasü.

Pai petition agütsüba nung, ken o kar nung aija alirtem political party ka nung ketdangpur akumba nokdangtsü ozüng mali, ta shia lir. ECP-i tashi tali amshia pa PTI menden nungi agientsü meranger, ta pai ashi.

Taoba küm April ita National Assembly nung pa anema no-confidence motion agizükba sülen ato kilonser menden nungi Khan anenja liasü. PTI tekolakba ya 2018 küm ato kilonser akum aser Parliament nung no-confidence vote agia Pakistan nung ato kilonser menden nungi anentsübaji pa dang lir.



Florida, United States nung aliba NASA indang Kennedy Space Center nung SpaceX Falcon 9 rocket ka aser Dragon spacecraft angur. NASA aser SpaceX ajannga March 2 nü Crew-6 mission ka International Space Station-i yoktsü sentong lir, koba Hombarnep 1:45 ako (Eastern Time) nung yoktsü liasü saka timtem kar ajanga athi.

## Bakmut tensa tamajungba akumer: Zelenskyy

**Kyiv, Tsüklai/February 28 (Agencies):** Linük anüdoklen Bakmut yimti nung tensa talitali tamajungba akumer, ta Ukraine Tir Volodymyr Zelenskyy-i ashi.

Russian sepaitemi iba yimti ya agitsü ita trok meranga arur. "Asen jenjang kumzüka ayutsü asoshi amshiba ajak tsükchir temi tanen makai raksatsür," ta pai ashi.

US Treasury Secretary Janet Yellen-i Hombarnü Kyiv semdangba mapang China dang Russia nem nok-nü magütsüsü tekumdangtsü ashiba sülen Ukraine leniri iba o ya jembia liasü.

Küm ka tejakdang Russia-i Ukraine amak tenzüker tesashitiba rara tem rongnung kar Bakmut nung ataloka lir, koba Ukraine indang Donetsk region nung lir aser iba region ya shilem ka Russia aser par

den sendaktepa aliba separatist kübok lir.

Russian sepaitemi industry agi sünga aliba yimti ya agitsü merangba tali kumogo aser sepaitemi yamaji takok angur.

Pei sasa sangdongba Donetsk People's Republic lenir Denis Pushilin-i ashiba agi, iba yimti telungi aiba lenmang ajunga Russia kübok lir.

Aser Ukraine indang ground forces tanishir Col Gen Oleksandr Syrskiy-ia Bakmut temeket nung tensa kangasa majung lir, ta ashi.

"Takoksa kanga jangja liaka tsükchirtemi kanga junga renema aliba Wagner indang unit tem yoker, aser parnoki asen sepa defence rakpoka aittsü aser yimti longbangtsü meranger," ta Gen Syrskiy-i ashi.

Tir Zelenskyy-i aonungshia nüburtem den jembidang,

Russia-i asendenshir amakba ajanga Bakmut nung tensa kanga mejungi kumer defence tsütsü tashi mait lir, ta ashi.

Tasü ita iba tesem soita ayur ajak dang kanga pelar, ta pai shia liasü.

Tir Zelenskyy-i maneni Russia nung kiralongraba nungi par linük kumzüka ayutsü asoshi par nem modern combat aircraft agütsüsü ashi.

Janet Yellen-i ajungbena Hombarnü Kyiv semdangba mapang Ukraine nem tang tesüsa sen billion \$1.25 jenjang teyari agütsüba sangdonga liasü.

Taoba hopta US Tir Joe Biden-i Kyiv semdangba mapang rara akoktsü asoshi mapang kobi südir süaka Ukraine den Washington nokdaka lir ta ashiba Yellen-ia nenshia ashi.

Anüolen linük temi Russia nem tenokdangba balala agütsüba ajanga Moscow rongsenketzüng nung ano timtem mali saka meilongi tashi maitba akumtsü imlar, ta lai ashi.

Ukraine amakba mapang samatsüba mitkar indang hadirtem melentsü Russia dak tashi aliba tanem-tanemi raksatsüogo aser China-i Russia nem iba amala nok-nü agütsüsü merangnungbo timtem tulu asütsü, ta Yellen-i tekumdangtsü ashi.

"Iba rara atema Russia nem mitkar hadirtem magütsüsü nükjidong nung tenokdangba agüja aliba nung linük kari danga aibelenra onoki tatok magütsüsü ta onoki kanga jangja shia arur," ta lai ashi.

"Aser onoki China sorkar dang tejangja shia arur aser

item tenokdangba nung aibelenba atema timtem tulu alitsü ta onoki China nung aliba firms aser financial institutions dang jangja shia lir."

China-i Russia nem nok-nü aser injang-bomb agütsüsü asadanger, ta taoba hopta US Secretary of State Antony Blinken-i shia liasü, saka Beijing-i khenyongi magizüker.

Taoba hopta Moscow nung China indang top diplomat Wang Yi aser Russia Tir Vladimir Putin ajurutepa senden amenba ya China aser Russia tesendaktep junga aliba temaitsü ka ama aikati angateter.

Aser Putin tembar tajung Belarus Tir Alexander Lukashenko-i Mongulbarnü nungi tenzüka asemnü China semdangtsü sentong lir. Iba mapang pai Tir Xi Jinping ajurutsü imlar.

## Messi aser Putellas nati FIFA Best Player sempet angu



France yimtiba, Paris nung Best FIFA Football Awards alidang FIFA tir Gianni Infantino ket nungi Argentina nungi Lionel Messi-i Best FIFA Men's Player Award aser Spain nungi Alexia Putellas-i Best FIFA Women's Player Award agizükba noksa nung angur.

**Paris, Tsüklai/February 28 (Agencies):** Argentina nung World Cup akokba mapang captain alisang Lionel Messi nem FIFA Men's Player of the Year sempet agütsü aser Spain nungi Alexia Putellas, shibai taoba kum Ballon d'Or sempet ngua liasü, la nem Women's Player of the Year sempet agüja liasü.

Arishi kum 35 tain Messi-i World Cup 2022 final nung France den asayadang goal ana agüja liasü aser penalties nung Argentina-i akok.

"Ibai tesümgangtsüka lir. Kum tajung liasü aser taonung ni yangi shilem agiba aser iba sempet anguba ya konang ka lir," ta Messi-i Hombarnü ashi. Paris nung aliba Salle Pleyel nung iba sentong agi tepiyong Messi ya France forward aser Paris Saint-Germain nungi külemi asayar Kylian Mbappe den külemi mena liasü.

Iba sempet atema Mbappe-a nomination nung shimoka liasü, shibai World Cup final nung goal asem agütsü.

Ajisüaka pai junga asayatetba ya Messi-i mapang talangka lir alima nung football asayamung tematiba akokba agi nembangtsü.

"Ni coach Lionel Scaloni aser külemi asayartem dang pelaba lemsateper. Parnok medeni ni yangi melila," ta Messi-i ashi.

"Ni mapang talangka nungi imla aliba bongmang ka ni koktetogo. Asayartem asoshi ibai bongmang ka lir aser nisung ishikati ibaji kokteter aser tia kaa nia inyaktet."

Argentina nungisa Scaloni aser Emiliano Martinez nati Coach of the Year aser Keeper of the Year sempet ngua liasü aser ano parnok busemer temi Best Fans' sempet ngua liasü.

Tetsürtem indang Euro 2022 akokba atema England nema sempet agüja liasü.

Mary Earps nem Keeper of the Year aser Dutch nung England coach Sarina Wiegman nem Best Coach sempet agütsü.

Polish amputee Marcin Oleksy nem Puskas prize for

the best goal of the year sempet agütsü.

### Takok angurtem yamai alitsü:

Best FIFA Women's Player: Alexia Putellas (Spain/FC Barcelona Femeni)

Best FIFA Men's Player: Lionel Messi (Argentina/Paris Saint-Germain FC)

Best FIFA Women's Goalkeeper: Mary Earps (England/Manchester United WFC)

Best FIFA Men's Goalkeeper: Emiliano Martínez (Argentina/Aston Villa FC)

Best FIFA Women's Coach: Sarina Wiegman (England Women's National Team)

Best FIFA Men's Coach: Lionel Scaloni (Argentina Men's National Team)

FIFA Puskás Award: Marcin Oleksy (Poland/Warta Pozna?)

FIFA Fair Play Award: Luka Lochoshvili (Georgia/Wolfsberger AC/US Cremonese)

FIFA Fan Award: Argentinian Fans

## Djokovic-i Steffi Graf indang world ranking otsü raksatsü



**Dubai, Tsüklai/February 28 (Agencies):** Steffi Graf hopta 377 tashi number one nung aliba otsü Hombarnü raksatsüba ya mamangteter, ta Novak Djokovic-i ashi.

Serbia nungba ya teburtem tennis asaya nung tematiba jenjang nung hopta 378 buba Dubai nung asaya amungtsü, kong pa taoba ita Australian

Open 10 ben koka 22nd Grand Slam title ngutetba sülen asayamung mezüngbuba alitsü.

"Ni ano takok tali aginer. Ni iba nukjidong nem anidaksür. Saisapong nung ni temolung ajunga agütsür," ta pai Deobarnü Dubai nung osangbener dang ashi.

"Steffi Graf den kasa hopta aika world number one nung

aliba ya ni mamangteter, shiba tetsür aser teburtem rongnung all-time greats ka lir. Item tenung tejen tem rongnung densemba ya pelar. Iba atema ni tejak denteter."

Iba season nung pai 12 ben asaya lir aser ajak nung pai koka arur. Taoba hopta pa temang nung timtem kecha mali aser Australia nung tebi abelen tezü atsüba nungi taneptsü nguogo, ta ashi.

"Ni noklang shilem tajungleni arur. Asaya tsütsü repringra ni temolung lemteta renema mali. Saka temang nung tashiba mali aser aji tongtipang lir. Court nung ni senzüba nung tetsükdaksü mali," ta arishi kum 35 tain Djokovic-i ashi.

Dubai nung pai Czech nung Tomas Machac den Mongulbarnü asayatsü, kong Daniil Medvedev, Felix Auger-Aliassime aser Andy Murray nungertema asayatsü imlar.

## Women's boxing Championship nung Ukraine-i shilem magitsü

**Tsüklai/February 28 (Agencies):** Taruba ita New Delhi nung asayatsü aliba Women's Boxing World Championship nung shilem magitsü atema telemetba agiba linüktem rongnung Ukraine-a densemogo.

Rara agi kanga mejungi kongshir aliba linük yagi ashiba agi, Russia aser Belarus nungi boxer tem asayatsü aliba ajanga parnoki iba asayamung nung shilem magitsü atema telemetba agiogo. Ukraine nung tebur tema World Championship nunga shilem magitsü.

Boxing Federation of Ukraine (FBU) vice-president Oleg Ilchenko-i ashiba agi, ozü linük amakba linüktem nungi boxer tem den Ukraine nung boxer tem masayatsü.

Russia-i Ukraine amak tenzüker Hokolbarnü kum ka jungogo. International Boxing Federation mepetmesü nung arua liasü, ajisüaka Russia-i Ukraine amak tenzüka sülen ano mepetmesü tali kumogo. Iba lokti tentet ya Russia nung ketdangsur Umar Kremlev tekolak ser inyaksangshir, shiba Vladimir Putin den kanga junga sendaktepa aliba ketdangsur ka ta züngshir.

"Onok telanzüba tejangja. Boxing Federation of Ukraine nungi asayartem aser ketdangsurtem onok amakertem; Russia aser Belarus den sabang ka nung külemi shilem magitsü," ta Ilchenko-i ashi.

Taoba kum Kremlev-i International Olympic Committee tetuyuba anema nokdak aser international asayamungtem nung Russia aser Belarus nungi asayartem pei linük wako kübok asaya alirtem nem tenokdangba agütsür aliba agintsü.

Iba asayamung nung Russia aser Belarus nung boxer tem züngoksemba sülen linük aikati shilem magitsü telemetba agiogo. Ukraine dak alia United States, Britain, Switzerland, Poland, Netherlands, Ireland, Czech Republic, Sweden aser Canada nungeria women's World Championships nung shilem magitsü telemetba agiogo, koba New Delhi nung March 15 nungi 26 tashi asayatsü renema lir.

Boxing Federation of India-i ashiba agi, linük 74 nungi boxer 350 dak tema iba asayamung nung shilem agitsü aser iba asayamung ya Paris Olympics atema qualifying event ka asütsü.

## ATP/WTA Indian Wells Masters nung Nick Kyrgios masayatsü



**Los Angeles, Tsüklai/February 28 (Agencies):** Temoko nung surgery agiba mapang shidak nung taneptsü mongutetba mechi taruba ita asayatsü aliba ATP/WTA Indian Wells Masters nungi Australia nung Nick Kyrgios withdraw süogo, ta iba asayamung ayonger temi Hombarnü ashi.

World number 19 nung alisang ya taoba kum September ita US Open quarter-finals tongtetba sülen October ita Tokyo nung asaya aser iba sülenbo asayamung kata nunga shilem magidang arua liasü.

Australian Open nungi withdraw asüba sülen January ita arishi kum 27 tain Kyrgios

ya temokok nung surgery agia liasü.

Mapang tatsüka lir Kyrgios manager Daniel Horsfall-i surgery takok ngua agiogo ta ashiba ajanga Indian Wells nung shilem agitsü imla liasü.

Taoba season Indian Wells nung Kyrgios-i quarter-finals nung Rafael Nadal makok tsükadok.

Indian Wells sülen asayatsü aliba Miami Open nungia Kyrgios-i withdraw süogo, ta osang kar ajanga ashir.

Taoba season Wimbledon final asayasang Kyrgios-i 2021 kum tetenzüklen iba mapang tetong merenshi ta Canberra nung court ka nung nangzükba sülen iba ken o talangka jembia arua liasü.

## BILEMDANGANG

"Pei kisung atema bilema inyakba agi alima rajang kumdaksür."